

Beč, 27. aprila/travnja 2020.

Poštovani roditelji, poštovani staratelji/skrbnici!

Period od posljednjih nekoliko sedmica bio je upravo za Vas posebno težak. Mnogi od Vas morali su svoj posao organizirati od kuće. U isto vrijeme smanjen je rad u školama i prebačen na učenje na daljinu. Ta odluka nije bila laka ni za saveznu vladu ni za mene kao resornog ministra. Ali bila je neophodna kako bi se zaštitilo stanovništvo i svi oni koji uče i predaju u našim školama.

U kratkom vremenu razvili smo modele za učenje na daljinu, potrudili se poboljšati digitalnu opremu naših učenika i učinili dostupnim digitalne sadržaje za nastavu i učenje. Uspostavili smo fond za naknadu storno troškova, nastalih zbog otkazanih školskih izleta i školskih manifestacija, kako bismo pomogli roditeljima i starateljima/skrbnicima u slučaju da ne mogu ostvariti povrat uplaćenog novca. A razvili smo i model za održavanje maturalnih i završnih ispita u vremenu korone.

Ali škola je mnogo više od mjesta za učenje. Jednako su važni socijalni kontakti i školska prijateljstva, susreti s drugom djecom i adolescentima te učiteljicama odn. učiteljima kao referentnim osobama. Sve to čini otvaranje škola važnim za naše društvo.

Od početka aprila/travnja bilježimo stabilizaciju broja infekcija. U mnogim oblastima javnog i ekonomskog života sada se pokušava uspostaviti nova normalnost i ponovo otpočeti s radom. Nakon pomnog razmatranja i u koordinaciji sa saveznom kancelarom i ministrom zdravlja, došlo je vrijeme da se u području školskog sistema napravi sljedeći korak.

U te svrhe smo razvili jasnu strategiju zasnovanu na sljedećim ključnim tačkama:

- Škole se neće otvoriti za sve učenike istovremeno.
 - Prvo otvaramo škole za starije učenike koji se nalaze u završnim razredima. Od 4.5. vraćaju se u škole maturantice i maturanti kao i sve učenice i učenici završnih razreda strukovnih škola.
 - Druga etapa planirana je za 18.5. Ona se odnosi na sve učenice i učenike u dobi od 6 do 14 godina, koji dakle pohađaju osnovne škole, niže razrede gimnazije (AHS-Unterstufe), nove srednje škole (NMS) i specijalne škole.
 - Ako sve prođe dobro i broj infekcija ne počne opet rasti, sa 3.6. slijedi treća etapa otvaranja škola kada će se otvoriti politehničke škole, gimnazije za više razrede (AHS-Oberstufe) te srednje i više strukovne škole.

Druga i treća etapa otpočinju uvijek s petkom, tj. s konferencijom nastavnog osoblja kako bi se dobro pripremio početak nastave za učenice i učenike u narednoj sedmici.

- Rad škola bit će organiziran u skladu sa sljedećih pet principa:
 1. Školska nastava u smjenama radi smanjena broja istovremeno prisutnih razreda
 2. Gradivo: manje je više
 3. Odmjereno ocjenjivanje
 4. Poštovanje higijenskih propisa
 5. Izuzeci za specijalno definirane grupe osoba
- Zamolio sam direktorice i direktore škola da naprave raspored smjena
 - za učenice i učenike osnovnih škola, novih srednjih škola (NMS) i nižih razreda gimnazije (AHS-Unterstufe) do 4. maja/svibnja
 - za ostale učenice i učenike do 15. maja/svibnja

Tako ćete imati vremena da organizirate svoje svakodnevne obaveze i da se sa svojom porodicom pripremite na ove nove okolnosti. Sve detaljnije informacije dobit ćete direktno od škole Vašeg djeteta.

Prilikom postepenog pokretanja rada u školama pobrinut ćemo se da se poštuju strogi higijenski propisi radi zaštite svih učenica i učenika koji dolaze u škole. Ako, međutim, zbog zabrinutosti za zdravlje svog djeteta, ne želite da se Vaše dijete vrati u školu, njegov izostanak će se smatrati opravdanim. Molimo da to javite upravi škole ili razredniku, tako da Vaše dijete može raditi na određenom gradivu od kuće.

Znamo da ovaj put predstavlja hodanje po rubu litice. On je međutim rezultat odmjeravanja potrebe za zaštitom zdravlja i obaveze da srednjo- i dugoročno našoj djeci i mladima obezbijedimo obrazovne i profesionalne šanse. Molim Vas da nam i Vi pomognete kako bismo bili uspješni na ovom putu.

Želim Vama i Vašoj porodici/obitelji sve najbolje. Zajedno ćemo uspjeti da uprkos korona-krizi našu djecu i naše mlade pripremimo za budućnost.

Uz srdačan pozdrav
Vaš



Heinz Faßmann

Univ.-Prof. Dr. Heinz Faßmann
Savezni ministar za obrazovanje,
znanost/nauku i istraživanje